

恩平縣志卷之十

典禮

慶賀
賓興

宣讀
送學

宣講
釋菜

上任
鄉約

行香
鄉飲

開封
鄉射

迎春
救護

釋回增美防偽教中者禮也禮以時為大我

國家承天配地迺緣人情而制禮依人性而作儀典至鉅
焉於是乎事有宜適物有節文多少隆殺大小顯微無
不燦然具備在朝言朝在官言官各府州縣咸得杼瞻

天仰

聖之誠而講秉耒肆筵之典濟濟翼翼我我如也由此增輝
風俗廣樹隄防即百姓允諧可觀矣志典禮

恩平縣志

卷之十

典禮

一

慶賀禮凡元旦冬至

萬壽節文武各官朝服同詣

萬壽宮行禮

儀注

凡慶賀預設香案龍亭於

萬壽宮至日各官衣朝衣五鼓齊集文從東邊入武從西邊入各至朝房設禮生二名稟鼓鼓三通畢各官以次至拜位禮生贊排班文武西立班齊禮生贊跪叩興各官行三跪九叩首禮禮生贊退各官退出其前後三日不穿朝服各穿蟒袍補褂坐班

萬壽聖節

恩平縣志

卷之十

典禮

一一

皇太后萬壽俱同遇

皇后千秋令節元旦長至儀節亦同惟不先後期坐班

宣讀禮

凡遇

詔書到日地方官員具龍亭綵輿儀仗鼓樂出郭迎至

萬壽宮行禮

儀注

預設

詔案香案出郭迎接齋生奉

詔勅置龍亭中南向齋生立於亭東地方官員具朝服北向行三跪九叩首禮衆官及鼓樂前導齋生隨亭後行至

萬壽宮門外衆官先入文武分東西序立候龍亭至

萬壽宮安正中齋生立亭東西向贊禮生贊排班樂作行三跪九叩首禮齋生捧

詔授展讀生跪受詣開讀案前立禮生贊跪衆官皆跪宣讀畢衆官皆起展讀生捧

詔書授齋生齋生跪受捧置龍亭中衆官行三跪九叩首禮畢受

詔官隨

詔回大堂供奉凡

詔書經過地方官員軍民人等俱跪路旁候

詔書過方起五里以內府州縣衛文武等官俱出城迎送五

恩平縣志

卷之十

典禮

三

里以外不許

宣講禮 每月朔望文武官紳齊集

萬壽宮恭設

聖諭牌於正中贊禮生贊排班各官依次就拜位立贊跪叩

興行三跪九叩首禮畢分班坐地軍民人等環立肅聽禮生唱恭請開講講生詣香案前跪恭捧

上諭及

欽頒律例登臺依次宣講畢各官退

上任禮凡新官將到先發紅示本衙門預備儀仗前期出城迎接至署

儀注

官具公服先詣城隍廟陳牲醴祭告行一跪三叩首禮
獻爵讀祝或有誓詞讀畢仍行一跪三叩首禮畢導引
至本衙門陳設牲醴於儀門前致祭司門之神行一跪
三叩首禮悉如前儀禮畢啟門導引至月臺上更朝服
設香案望

闕行三跪九叩首禮畢易公服拜印置印盒於案中行一跪
三叩首禮啟印盒出印置盒上再行一跪三叩首禮平
身升公座開印皂隸稟排衙吏書呈押屬官吏役各以
次參見畢退入後衙謁竈神祀香火其行香講書閱城

恩平縣志

卷之十

典禮

四

祭倉等事次第舉行

行香禮 凡新官到任或次日或第三日例赴各廟行香
前一日示期至日視各廟應穿禮服及跪叩儀節分別
行禮每月朔望亦如之

儀注

如

文廟

關帝廟行三跪九叩首禮城隍廟土地祠行一跪三叩首禮
凡行香俱在黎明以昭誠敬雍正年間通行遵照
講書 先於明倫堂設公座及講案諸生恭候於大門新
官至一揖導引至明倫堂公座諸生行庭參禮新官拱

手答直講之生向上三揖端立抗聲講說書義畢三揖而退次直講如前儀講畢新官申訓詞分給紙筆獎直講之生新官起諸生仍趨至大門揖送

祭倉 凡新官盤倉先日示期至日備牲醴祭告倉神行一跪三叩首禮畢啟倉封開盤米穀每年開徵色米祭亦如之

附錄祝文

城隍廟惟 神聰明正直職陰佐陽佑我兆民金湯永固
茲以蒞任之初謹具牲醴特申祭告尙 饗

儀門惟 神職司闔闢洞達無私出入有常罔敢隕越茲

恩平縣志

卷之十

典禮

五

以蒞任之初謹具牲醴用申昭告尙 饗

開印禮每正月開印十二月封印皆遵照 部行欽天監

擇定日時行禮

儀注

開印與上任拜印同封印跪叩同開印但封印惟標記印封不呈押公座

賓興禮 凡遇鄉試之年儒學將奉准督學錄科生員先期呈送縣官擇日具書柬延集科舉諸生至期結綵於大堂或明倫堂鼓樂設宴拜揖如儀就坐縣官儒學各一席東西向南僉坐諸生以次兩旁列坐酒五行或卜行起諸生辭別由中門鼓樂送出縣官送至大堂簷外送學禮 凡督學歲科取進文武新生紅案到縣後縣官

擇日送學先期傳知新生至日大堂結綵備果盒新生齊集縣官出大堂升公座新生行庭叅禮向上三揖縣官拱立答禮稟拜免分兩旁列坐酒三杯簪花掛紅由中門出鼓樂前導至學宮前候縣官至入廟謁

聖縣官在前新生在後以次立行三跪九叩首禮畢至明倫堂縣官在左西向學官在右東向行兩拜禮畢換塾學官在左西向縣官在右東向行兩拜禮畢新生向學官行四拜禮學官立受兩拜陪受兩拜畢新生向縣官拜謝行四拜禮新生拜縣官皆答揖畢新生分東西立對面三揖禮畢新生鼓樂迎回縣官學官各揖別回署

恩平縣志

卷之十

典禮

六

釋菜禮 每年書院啟館先時陳設香燭茶酒蔬果各

器是日昧爽主人

印官如遇公出或教官或屬員代

躬造書院送諸生

入院肄業諸生俱迎於大門外序立恭揖主人拱手答入院升堂與院長行賓主禮序坐飲茶畢禮生請院長行釋菜禮院長別主人至盥洗所盥手詣

先賢位前跪諸生皆跪院長三上香三奠爵俯伏興平身院長及諸生皆起院長復位率諸生行四拜禮畢轉講堂行送學禮主人與院長對行四拜禮院長居左主人居右皆北面拜畢諸生序立向上行四拜禮院長旁立答揖拜畢諸生拜主人北面行四拜禮主人旁立答拜

如印官爲主人而教官同在書院諸生向教官行四拜禮教官受二拜扶起畢諸生東西分班對面行四拜禮畢諸生暫退主人與院長衆官序席畢主人衆官各辭別諸生趨至大門外揖送魚貫升堂請院長登講席諸生朝上三揖院長起立拱手復坐諸生分兩旁序立聽講講畢諸生或有書義未明許肅容質問問畢向上三揖各退肄業

講鄉約禮 凡距城各鄉有民居稠密人烟湊集者各立講約所於舉貢生員內揀選老成有學行者一人立爲約正於百姓內揀選樸實謹守者三四人輪爲值月置

恩平縣志

卷之十

典禮

七

簿二德業可勸者爲一簿過失可規者爲一簿值月掌之月中則告於約正而授於其次每月朔日值月者先期約會同鄉之人夙興集於講所俟約正及耆老里長至相對三揖衆以齒分左右立設案於庭中值月者向案北向立抗聲宣讀

聖諭廣訓各人肅聽約正復推說其義必剴切叮嚀務使警悟通曉未達者仍許其質問講畢於此鄉內有善者衆推之有過者值月糾之約正詢其實狀衆無異詞乃命值月分別書之值月遂讀記善簿一遍其記過簿呈約正及耆老默視一遍皆付值月收之事畢衆揖而退歲

終則考校其善過彙報於縣官設爲勸懲之法有能改過者一體獎勵使之鼓舞不倦

鄉飲酒禮

大清會典順治初令京府及直省府州縣每歲舉行鄉飲酒禮設賓僎介主酒席於存留錢糧內支辦凡以申明朝廷之法敦長幼之節遂爲定制云

順治二年定順天府詳查鄉飲酒禮舊制移送禮部題請施行嗣後每歲由順天府題明康熙元年定奉天府州縣行鄉飲酒禮雍正元年

諭鄉飲酒禮乃敬老尊賢之古制近聞年久視爲具文所備

恩平縣志

卷之十

典禮


八

筵宴亦甚不堪應加謹舉行乾隆十九年會典館奏定各省舉行鄉飲酒事不畫一旦竟有頻年闕畧不舉致曠

大典者應令各省督撫轉飭所屬府州縣每歲遵照定例於正月十月舉行二次其賓介之數據舊典所載鄉飲酒圖有大賓介賓一賓二賓三賓衆賓與大僎一僎二僎三僎之名按儀禮賓若有尊者諸公大夫則旣一人舉觶乃入注言今文遵爲僎又曰此鄉之人仕至大夫者來助主人樂賓主人所榮而遵法者也可能有無來不來用時事耳又曰不干主人正禮也謂之賓者同從外

來耳大國有孤四命謂之公又疏言一人舉觶爲旅酬始乃入卽是作樂前入又戴記坐僎於東北以輔主人所謂席於賓東助主人樂賓者也其言主人親速賓及介而衆賓自從之至於門外主人拜賓及介而衆賓自入三揖至於階三讓以賓升拜至獻酬辭讓之節繁及介省矣至於衆賓升受坐祭卒飲不酢而降皆無一言及僎者所謂不干主人正禮者也嗣後應令順天府及直省府州縣先期訪紳士之年高德邵者一人爲大賓次爲介又次爲衆賓皆由縣官詳報府尹督府覈定舉行其本地有仕至顯官偶居鄉里願來觀禮者依古禮

坐於東北順天府及直省會城一品席南嚮二三品席西嚮各府州縣三品以上席南嚮四五品席西嚮無則闕之不立一僎二僎三僎之名不入舉報之內仍將所舉賓介造其姓名籍貫清冊送部存案倘鄉飲後有過犯按所犯輕重詳報漚革咨部除名并將原舉之官議處



凡歲正月十五日十月初一日於儒學行鄉飲酒禮

儀注

恩平縣志

卷之十

典禮

十

前一日執事者於儒學之講堂依圖陳設坐次司正率執事習禮至日黎明執事者宰牲具饌主人及僚屬司正先詣學遣人速賓僕以下比至執事者先報曰賓至主席率僚屬出迎於庠門之外揖入主居東賓居西三讓三揖而後升堂東西相向立贊兩拜賓坐執事者又報曰僕至主席又率僚屬出迎揖讓升堂拜坐如前儀賓僕介至既就位執事者贊司正揚觶執事者引司正由西階升詣堂中北面立執事者贊賓僕以下皆立贊揖司正揖賓僕以下皆揖執事者以觶酌酒授司正司正舉酒曰恭惟

朝廷率由舊章敦崇禮教舉行鄉飲非爲飲食凡我長幼各相勸勉爲臣盡忠爲子盡孝長幼有序兄弟恭內睦宗族外和鄉里無或廢墜以忝所生讀畢執事者唱司正飲酒飲畢以觶授執事執事者唱揖司正揖賓僕以下皆揖司正復位賓僕以下皆坐贊讀畢令執事者舉律令案於堂之中贊禮引讀律令者詣案前北面立唱賓僕以下皆立行揖禮如前讀畢復位執事者唱供饌案執事舉饌案至賓前次僕次介次主三賓以下各以次舉訖執事者贊獻賓主起席北面立執事者酌酒以授主主受爵詣賓前置於席稍退贊兩拜賓答拜訖

執事者又酌酒以授主主受爵詣僕前置於席交拜如前儀畢主退復位執事者贊賓酬酒賓起僕從之執事者酌酒授賓賓受爵詣主前置於席稍退贊兩拜賓僕主交拜訖各就位坐執事者分左右立介三賓衆賓以下以次酌酒於席訖執事者唱飲酒或三行或五行供湯又唱酌酒飲酒供湯三品畢執事者唱徹饌候徹饌案訖唱賓僕以下皆行禮僕主僚屬居東賓介三賓衆賓居西贊兩拜訖唱送賓以次下堂分東西行仍三揖出庠門而退

主

府知府州知州縣知縣如無正官佐貳官代

位於東南大賓以致仕官爲

之位於西北僎賓擇鄉里年高有德之人位於東北介以次長位於西南三賓以賓之次者爲之位於賓主介僎之後除賓僎外衆賓序齒列坐其僚屬則序爵司正以教職爲之主揚觶以罰失儀贊禮者以老成生員爲之

律令凡鄉飲酒禮序長幼論賢良別奸頑其坐席間高年有德者居上高年淳篤者並之以次序齒而列其有違條犯法者不許干與良善之席違者罪以違制敢有喧嘩失禮者揚觶者以禮責之

鄉射禮 凡射先期定耦選執事司正一人驗射司射一

恩平縣志

卷之十

典禮

十一

人掌弓誘射掌爵一人授飲侍獲一人掌矢執旗六人司舉應請射二人司請射以鄉官一人爲主射至期設坐於堂上正官主射居中諸生兩旁列坐陳弓矢案爵案於堂下弓三等階下列兕中鹿中各一以木爲之長一尺二寸高七寸前足跪皆有八孔大可容算算以十耦爲率凡八十 盛以桶設射位於兩楹之間左爲上右爲下樹正鵠於正南北向或三十步或五十步至七十步而止射必四矢以二人爲耦有布鵠以布爲之有的無采官之子弟及士民俊秀射之有狐鵠的以皮采二層狐皮緣其外六品至九品官射之容二以木爲匡

七寸許後植白旗六備五色及采

堂之陳設定正官及主射至乃發鼓速廩鼓六

執事者各就位侍獲捧弓矢置正官及主射前諸生詣

官主射前向上三揖正官主射皆各揖諸生退詣弓

矢案請弓矢侍獲授弓矢各復本位請射者請誘射執

事者置中於射位前司正執算入書射者名各四退立

於中後司射二人爲一耦執弓取矢於楅始進揖取矢

揖各措三矢於腰右以一矢挾於二矢之間既措挾揖

相讓以齒長居左幼居右徐行及階揖升階揖就射位

揖長射先詣上位正立取矢橫弓卻手兼附順羽拾

恩平縣志

卷之十

典禮

十二

取引滿而後發中則司正書於算畢投算於中執旗舉

旗以應四矢畢上射退立於旁下射詣下位發矢取算

書中舉旗咸如前式射畢與上射揖以耦退及階揖降

階揖復與將進者揖乃退侍獲者收矢復於主射司正

取所中算衆耦以次進先士民俊秀次官員子弟次下

僚以至高位自始進至於收矢咸如前式射畢司正持

算白於主射司爵酌酒飲射者勝者袒決遂執張弓不

勝者襲說決拾加弛弓升飲飲必揖終飲奉弓矢納於

案還詣主射正官前三揖乃退

按鄉射之禮以五物詢衆庶一曰和二曰容所以扶助

微弱而抑其強和調陰陽戒不虞也當階及階當物及物進退周還必中禮而後心平體正可以命中容之安和之至也周禮大夫之射樂以采蘋士之射樂以采蘩禮也而樂寓焉明洪武初詔天下儒學就學闢射圃習射朔望有試乃學宮教士之法非古鄉射之本意則古制之不明久矣今

國家型方訓俗禮教大備挽強命中之技又所在多有況恩平燐燹之餘射圃久廢宜乎數十年來未聞有行之者存其畧於鄉飲酒之後在有志復古者舉而修明之耳

恩平縣志

卷之十

典禮

十四

迎春禮每歲立春地方官遵照會典行禮

儀注

先期塑造芒神一位土牛一座前一日各官吉服迎於東郊向芒神位前一揖三獻酒點睛再一揖迎芒神土牛回縣安於儀門外土牛南向芒神在東西向候交春時陳設牲醴各官衣朝衣詣芒神前行一跪三叩首禮興詣香案前三獻酒復位再行一跪三叩首禮畢各執綵仗環立正官擊鼓三聲執春鞭同衆官由東起遶牛三周鞭三鞭庶民終之

土牛式 土牛胎骨用桑柘木身高四尺按四時長三

尺六寸按三百六十日頭至尾長八尺按八節尾長一尺二寸按十二時鞭用柳枝長二尺四寸按二十四氣牛色以本年爲法頭角耳用本年天干身用本年地支蹄尾肚爲納音天干于甲乙屬木色青地支亥子屬水色黑納音如甲子年立春納音屬金用白餘倣此籠頭拘索以立春日干爲籠頭色拘用桑柘木索孟日用麻謂寅申巳亥日仲日用苧謂子午卯酉日季日用絲謂辰戌丑未日造牛以冬至節後辰日於歲德方取水甲年東方甲位乙年西方庚位丙年南方午位丁年北方壬位戊年東西方戊位巳年東方甲位庚年西方庚位辛

年南方丙位壬年北方壬位癸年東南方戊位

芒神式 芒神服色用立春日支辰受尅爲衣色尅衣爲繫腰色如立春子曰屬水衣取土尅水用黃色繫腰取木尅土用青色餘日倣此頭髻用立春日納音爲法金日平梳兩髻在耳前木日平梳兩髻在耳後水日平梳左髻在耳前右髻在耳後火日平梳右髻在耳前左髻在耳後土日平梳兩髻在頂直上罽耳用立春時爲法從卯至戌八時罽耳用手提陰時右手提陽時左手提從亥至寅四時罽耳或揭或掩寅時揭從左邊亥時揭從右邊子丑二時全戴蓋寅亥時爲通氣故揭一邊

子丑時爲嚴凝故全戴鞋袴行纏以立春納音爲法逢金木繫行纏鞋袴金行纏左闕懸在腰左木行纏右闕繫在腰右水日俱全火日俱無土日著袴無行纏鞋子老少以立春年爲法寅申巳亥老子午卯酉壯辰戌丑未幼身高三尺六寸按一年三百六十日

救護禮 凡遇日食於朔月食於望遵照 部頒欽天監推算時刻於本衙門救護至期預設香案於月臺上設金鼓於儀門內兩旁設各官拜位於月臺上俱向日月所在

儀注

恩平縣志

卷之十

典禮

十六

陰陽生報初虧各官服素服至香案前班首官上香各官俱行三跪九叩首禮興復跪陰陽生捧鼓進桴班首官擊鼓三聲堂下金鼓齊鳴少頃興暫退陰陽生報食甚行禮如前儀陰陽生報復圓鼓聲止各官復行三跪九叩首禮畢

按救護儀注會典所載自初食以至復圓皆穿朝服乾隆四十七年奉

上諭嗣後遇日月食行救護禮俱素服將事今相沿初食穿補服行禮食甚更素服復圓乃穿朝服

恩平縣志卷之十終